

18 MAY 2001

PM ADAKAN PERJUMPAAN DENGAN PEMIMPIN UMNO GELANG PATAH DAN PONTIAN

JOHOR BAHRU, 18 Mei (Bernama) -- Perdana Menteri Datuk Seri Dr Mahathir Mohamad hari ini mengadakan perjumpaan tertutup dengan pemimpin-pemimpin Umno Bahagian Gelang Patah dan Pontian di Dewan Raya Gelang Patah, dekat sini.

Perdana Menteri yang tiba dengan menaiki helikopter dari Tangkak turut diiringi oleh isteri Datin Seri Dr Siti Hasmah Mohd Ali, Menteri Besar Datuk Abdul Ghani Othman dan isteri serta Menteri Penerangan Tan Sri Khalil Yaakob, yang juga Setiausaha Agung Umno.

Menteri Perdagangan Dalam Negeri dan Hal Ehwal Pengguna, Tan Sri Muhyiddin Yassin, yang juga Ketua Umno Bahagian Pagoh menyambut ketibaan rombongan Perdana Menteri bersama Anggota Parlimen Tebrau Datuk Mohamad Ali Hassan dan pemangku Setiausaha Kerajaan Negeri Johor Datuk Ayob Mion.

Ketibaan Dr Mahathir bersama rombongan di padang Majlis Bandaraya Johor Baharu Tengah Gelang Patah pada pukul 4.08 petang disambut ribuan penduduk tempatan dengan iringan paluan kompang dan tarian singa.

Dr Mahathir kemudian mengadakan pertemuan dengan lebih 800 anggota Umno di kedua-dua bahagian itu selama hampir dua jam,

Turut hadir Ketua Umno Bahagian Pontian, Hasni Mohamad, Timbalan Ketua Umno Bahagian Gelang Patah, Abdul Rahim Tukimin.

Dr Mahathir dan isteri kemudian bertolak ke Johor Baharu dengan menaiki kereta.

Malam ini, Perdana Menteri merasmikan Seminar Pembangunan Ummah di Hotel Puteri Pan Pacific di sini.

-- BERNAMA

RAM ZB